

李文忠公全書

奏稿

李忠節公奏議卷十一

奏瀝陳礦務利害情形摺

光緒二十二年正月二十四日

奏爲山東礦務欽奉

諭旨飭辦謹瀝陳利害情形恭摺仰祈

聖鑒事竊臣於上年十二月二十八日承准軍機大臣字寄光緒

二十一年十二月二十四日奉

上諭御史陳其璋奏山東開礦

不宜停止請飭派賢員實力開辦一摺現在帑項支絀籌款維艱
前經通諭各直省疆吏體察本省情形將礦務實力開辦原期收
地利以裨國用覽該撫前奏不過以辦理不得其人暫請封禁今
該御史謂不宜停止頗屬有見自未便因噎廢食即著李秉衡督
飭李興銳詳細查勘擇要開辦該撫毋得因已允封禁之請稍執

成見原摺著鈔給閱看等因欽此仰見 皇上因時制宜開利源以裕度支之至意方今帑藏空虛財用匱乏苟可以收地利而裨國用臣敢不恪遵 諭旨勉力籌辦以裕不匱之源惟臣詳察往事審度利害實見山東礦務仍有宜於緩辦者敬爲我 皇上陳之查該御史論開礦之法曰選礦師也購機器也度地勢也禁私人也意謂有此數端則開採總可大獲利益然臣嘗歷考其本末矣山東礦務自光緒七年候選中書馬建常稟請試辦九年以前濟東道李宗岱總理其事殫精畢慮者十有餘年先後所聘西洋礦師曰璧赤曰阿魯士威曰瓦尊皆所稱礦學之最精者也購器則開山戽水及化金等項機器皆自美國之金山購來所稱用之

必大有成效者也度地則自莒州平度甯海招遠以及福山棲霞萊陽掖縣濰縣沂水日照蒙陰臨朐安邱凡登萊青沂四府所屬之地相度幾徧其平度之三座山酒店雙山等處則壁赤所指爲金穴阿魯士威所指爲比之美國亦算超等之礦者而卒以出金不旺棄之是礦師非未選機器非未購地勢非未度也所謂獲利益者安在哉至於禁用私人自係當然惟礦產本無把握則又不私人之盡去與否爲得失也該御史又謂甯海礦產饒富爲德商所垂涎臣以爲不必慮也中國九州土腴財賦之區所在多有彼族即懷貪謀而中朝之疆土權自皇上主之不難據理以相折也夫 朝廷所以允開礦之請者原欲以濟國用諸臣之屢請

開礦者亦無不以利國動 朝廷然近十餘年來各省之議開礦者屢矣如直隸順德之銅礦江南徐州之鐵礦湖北鶴峯長樂之銅鉛礦奉天金州之駱馬山煤鐵礦皆旋開旋停不獨於 國計絲毫無益並其自集資本亦歸耗散往事歷歷可徵已即李宗岱先後集股並息借款項共四十餘萬金固早已付之東流矣其礦丁自停辦後多已四散餘因找算工價未去者人數無多若再開辦非另行招集不可現在倭兵屯駐威海臣前奏請封禁正慮其招集多人聚處滋事而該御史反謂封禁恐致貽患則非臣愚所敢知也臣仰荷 天恩高厚凡於 國家有益之事即 廷旨所未及猶當盡心力而爲之若復稍執成見不獨無以對 朝廷抑

亦負慙夙夜臣雖至愚萬萬不敢出此實見夫有害無利權衡已熟不得不披瀝上陳伏乞 聖明俯納臣言仍如 前旨暫允封禁俟遲數年後倭兵盡退再飭李興銳詳細查勘應如何籌議可以有利無弊之處當 奏明請 旨遵行臣不勝悚懼屏營之至謹繕摺具 奏伏乞 皇上聖鑒訓示謹 奏
光緒二十二年二月初九日留中

奏撥款修培隄埝片

光緒二十二年正月二十四日

再臣承准軍機大臣字寄光緒二十二年正月初七日奉 上諭李秉衡奏河臣到任需時所有黃河來歲應用料物豫爲儲備隄埝緊急工程擇要修培一摺東省河工極關緊要仍著責成該撫

將應行修培之處趕緊興修務臻穩固等因欽此仰見 聖主慎重河防至意臣於上年赴工即飭將最卑最薄之處擇要勘估計工需六萬餘金已飭司照估籌撥惟司庫本不充裕各防軍需餉尙鉅竭蹶異常查上年估堵北趙家高家大廟兩處漫口共請撥銀十五萬兩嗣經臣督飭各總辦加意撙節兼以高家大廟形勢稍變兩處共用銀不過七萬兩尙餘存八萬兩即將此款提撥六萬兩爲培隄之用謹當恪遵 諭旨督飭工員趕緊興修務於桃汎以前歲事又北運河自陶成堡以北水無來源每年借黃濟運當盛漲之際一經開壩勢若建瓴深懼大溜全趨運河爲患甚大且黃水所至之處河復淤墊至回空時不敷浮送仍須設法引水

諸多窒礙現擬於陶成堡運口內修建水櫃引濮州范縣一帶坡水由張秋掛劍臺導入水櫃以資儲蓄至重運渡黃之時如水勢尙旺則清可敵黃當不致仍前淤墊查中游總辦道員李希杰辦理中游河工任事實心不遺餘力復能節省經費爲數甚鉅臣已飭前往試辦該道員亦以自任甚勇應用款項先儘堵口項下培隄餘賸之二萬兩動用如有不敷再另行設法籌撥合併聲明謹附片具 奏伏乞 聖鑒訓示謹 奏 光緒二十二年二月初九日奉 硃批該部知道欽此

奏山東南運額引未能全銷摺

光緒二十二年正月二十七日

奏爲山東南運額引實係未能全銷並無捏完作欠情事恭摺瀝

陳仰祈 聖鑒事竊臣於光緒二十一年十一月具 奏裁革南運濫支款項提出擴充製造機器一摺欽奉 硃批著照所請戶部知道欽此欽遵在案茲准戶部咨開山東鹽務南運先後奏歸官運額引十萬二千二百餘道應徵課銀二萬五千零四十餘兩該省歷年造報銷引徵課均不過得半之數今該撫但節浮費即有盈餘四萬餘兩而每年所報徵收課銀乃不過一萬兩上下明係捏完作欠殊屬不成事體應令嚴飭各該委員嗣後務須按年銷完額引十萬二千二百餘道徵足課銀二萬五千零四十餘兩不准再有短少至此次提歸機器局銀四萬餘兩歸於該省機器局何年報銷案內造報應令查明聲覆以憑考核等因自係爲慎

重課款起見惟查南運引岸河南商邱等九州縣每年額引七萬八百一十道自道光二十九年至同治五年官商並運共計未領引七十九萬五千六百九十三道同治六年前撫臣丁寶楨奏請改歸官辦以餘利提充軍餉每年領引亦不過二萬四千餘道多者二萬六千道至同治十年安徽宿州改歸官辦增額引一萬三千七百三十五道光緒元年渦陽縣改歸官辦增額引二千三百道光緒十八年江蘇銅山縣改歸官辦又增額引一萬五千三百五十六道通計每年額引十萬二千二百一道考其銷數則同治十年以後每年銷引三萬一千及三萬二千餘道不等光緒元年以後惟十三年銷引五萬道其餘年分則自三萬二千道至四萬

三千餘道不等光緒十八年額引增至前數而所銷亦祇四萬七千三百道十九年銷引五萬道二十年銷引六萬餘道二十一年銷引五萬二千餘道而歷年完繳課銀已領未銷之引現尙積存數萬餘道實由河南各州縣南北通衢淮私蘆私分道浸灌安徽宿渦及江蘇銅山淮私浸灌引岸疲敝已極雖迭經設法整理難期成效此歷來額引未能全銷之實在情形也臣前奏謂盈餘之款每歲可得四萬金即指近年所銷五萬餘引之餘利除完納正雜課款外約可盈餘此數查此項餘利當十八年以前銷引較少獲利雖不盡有四萬之多要皆濫支濫應上下朋分無銖兩充公家之用者至課之多寡本視銷引之衰旺爲增減初不得因有餘

利遂謂能多銷引數也溯查南運引積課懸由來已久以前者無論已即道光二十九年以後五十年來銷引從未過半部臣不責以未能也自丁寶楨以後歷年餘利盡飽私囊部臣亦無從而知之也今臣舉向時上下私攫之款絜而歸之公家而部臣轉責以全銷額引是舉數十年所不能辦者督過於一時臣即有桑孔之術亦無所施其力總之未完之課實有未領之引臣迭飭局員認真整頓總辦道員康奉藹潔已奉公深知自愛用能合力一一歸公惟歷年所銷實止此數而遽蒙以捏完作欠之咎亦非臣心所安且以向歸私飽之四萬餘兩尙奏請歸公而以應繳額課之一萬餘兩反捏完作欠雖在貪饕亦愚不至此至此次擴充機器局

需款十數萬兩所提銀兩臣前奏已聲明須積至數年始敷購機器之用俟集有成數自當列入機器局收項照例報銷不得以已經奏明之款復任弊混也在部臣總司出納自有考核之權而微臣體念時艱凡所以除浮濫而裨正用者已無不竭忱盡智期於涓滴歸公如東海關臨清關等處臣迭飭嚴加釐剔皆有提出充公之款俟章程詳定均當舉以上聞若臣革除一弊而部臣於除弊之外復刻以相繩臣實無從措手迂直之性不得不據實上陳所有東省南運額引實係未能全銷並無捏完作欠緣由謹專摺具奏伏乞皇上聖鑒訓示謹奏
光緒二十二年二月初九日奉 硃批戶部知道欽此

奏凌汎期內黃河兩岸防護平穩摺

光緒二十二年正月二十七日

奏爲凌汎期內黃河兩岸防護平穩恭摺仰祈 聖鑒事竊維黃

河歲分四汎固以桃伏秋三汎爲重而凌汎易於出險亦關緊要當冬令嚴寒冰塊凝結迨春融冰泮上下游寒暖不齊不能同時全釋斷冰雜流每於河灣壅積堤埝埽壩當之無不被沖故凌汎期內失事者往往有之臣先期嚴飭在工員弁於河身淺窄灣曲處所密排椿木並多備敲凌器具遇有險工隨時相機搶護幸本年氣候較暖東風解凍河流順軌兩岸工程現均一律防護平穩洵堪仰慰 宸厪轉瞬桃汎經臨凡有上中下三游卑薄隄埝業已分派勤幹各員認真增培應需各項料物亦已委員採購按段

李忠簡公奏議 卷十一
堆存備用新任河臣未到東以前臣仍當督飭加意修守務臻穩固以重河防不敢稍涉疎懈所有凌汎期內黃河兩岸防護平穩緣由謹恭摺具陳伏乞 皇上聖鑒謹 奏 光緒二十二年二月初九日奉 硃批知道了欽此

奏請免扣甯海等十二州縣軍需三成摺

光緒二十二年二月十五日

奏爲甯海等十二州縣缺分最苦請免接扣本年軍需三成養廉以示體恤恭摺仰祈 聖鑒事竊東省文武各官養廉上年核扣部提軍需三成充餉當因新舊並扣不敷辦公請將無關部庫之由外彌補軍需一成二成三成銀兩暫行停扣並將額廉無幾之文職首領佐雜武職千把外委各員弁免其提扣三成經臣 奏

明通飭遵照在案茲准部咨戶部具奏仍照前案核扣成數再行
接扣一年等因奉 旨依議欽此咨行到臣自應欽遵辦理伏查
養廉軍需三成本年既照前案接扣一年則由外彌補軍需一二
三成廉銀以及首領佐雜千把外委各員弁養廉亦應再行分別
停扣免扣以資辦公其有關部庫之停給核減各成並六分減平
仍舊照案核扣惟通省一百七州縣內有下下苦缺三十二處辦
公本形竭蹶加以上年扣解部提軍需三成爲數較鉅更慮入不
敷出因思養廉之設原所以激勵廉隅若扣成過多未免因公賠
累轉啟虧挪之漸臣與司道再四籌商擇其下下苦缺中之最苦
者甯海文登榮成棲霞招遠高苑博興新城齊東青城利津霑化

等十二州縣或經兵燹或鄰防所或遭水患其瘠苦情形均較他處爲尤甚如再接再扣本年軍需三成實屬力有未逮據藩司張國正詳請具 奏前來合無仰懇 天恩俯念甯海等十二州縣缺分最苦准免接扣本年軍需三成養廉以示體恤出自 逾格鴻慈除咨部查照外謹恭摺具陳伏乞 皇上聖鑒訓示謹 奏

光緒二十二年二月三十日奉 硃批著照所請戶部知道欽此

奏南運河工程暫歸東省試辦片

光緒二十二年二月十五日

再南運河工廢弛已深非力除積習大加修濬漕艘不能暢行民生不能補救擬請暫歸東省試辦並委候選道馬開玉分省補用知府李祐詳細勘估興工經臣奏奉 硃批該部議奏欽此自應